



Bolsonaro ken o ya 'witch hunt' masü: Brazil Tir Lula

Sen, Satwik-Chirag nunger China Masters nung asayatsü



ENSF-i tesayur rationalization anema lungkak aiter



September 15, 2025 nü CWS nung shisaliok zülur Chongshen M-i Tuensang nung District Project Officer Land Resources office shibangtsüba mapang tangokba noksa.

Tuensang, Rongjui/September 15(TYO): Eastern Nagaland tesem ajak nung tesayur rationalization ajanga tesayurtem tim mesüi Eastern linük nungi transfer bener aoba anema Eastern Nagaland Students' Federation (ENSF)-i lungkak aitogo.

ENSF-i September 11 nungi 14 tashi lungkak aitba mezüngbuba shilem shilem

agiogo.

Iba mapang parnoki Education office ajak shibangja liasü, saka sorkar nungi telangzüba kecha maliba agi tanü September 15 nü nungi tanabuba shilem (second phase) tenzükogo.

Tanü Tuensang nunga Chang Wedoshi Setshang (Chang Students' Conference) ajanga iba lungkak aitba nung shilem agiogo.

NH-29: Pagalapahar lenmang tera lapoker

Dimapur, September 15, 2025 (TYO): NH-29 nung anentsüh alua aliba Chathe/ Tsiedukhru (Pagalapahar) lenmang shibanga liasü saka lenmang tera lapoka garitem senzütsü melar ta Commissioner of Police Aotula T. Imchen, IPS-i metetdaksüogo.

September 15, 2025 nungi iba lenmang nung gari tilatem single lane nung senzütsü melar. Maneni iba lenmang nung September 16,

2025 anepdang 8:00 nungi ang Heavy Motor vehicle (HMV) (upto 6 wheels) senzütsü melar ta CP Dimapur-i ashi.

Ajisüaka tzunglu kanga arura NH-29 kübok iba lenmang nung gari senzüba noktangtsü ta laisa ashi.

New Chumoukedima aser Old Chumoukedima tsüngda bypass route nung mapang lemsar garitem senzüdaksütsü ta CP Dimapur-isa metetdaksüogo.

ANCSU-i scholarship agütsütsü nenshir

Dimapur, September 15, 2025 (TYO): All Nagaland College Students' Union (ANCSU)-i Higher Education & Tourism Minister dang academic year 2024-2025 atema Post Matric Scholarship ST 2nd phase agütsütsü atema shidi ka zülüogo.

"Nai bangdak Ministry den jembitepa June 2025 nung kaketshir 22,000 nem 1 phase PMS ST agütsüba atema pelar. Ajisüaka tanüngba kaketshirtemi Scholarship ST 2nd phase

angutsü yongyateper kechiyong iba ajanga parnoki tuition fees, hostel fees aser tanga academic expenses agütsütsü" ta ANCSU President Tenyesinlo Bukh aser Secretary Kivinoka A Sema nati shidi nung ashi.

ANCSU-isa Minister dang 2024-2025 atema Ministry of Tribal Affairs, Government of India den jembitepa tekarakaba nung 2nd phase Post Matric Scholarship ST agütsütsü mepishia metetdaksüogo.

Tanü nungi Niuland-Zadima road shibanger

Dimapur, September 15, 2025 (TYO): Niuland district kübok asüng nungi Niuland-Zadima lenmang nung garitem mesenzütsü metetdaksüogo.

Iba tetuyuba ya Hovishe aser Ghotovi village council temi agütsü aser parnoki asüngnep 6:00 ako nungi garitem noktangba metetdaksü.

Niuland-Zadima road kanga majung aliba yanglushitsü

atema aiben mepishia arur saka mapa meinyakba atema iba tenokdangba agütsür ta village council anati ashi.

State sorkari Niuland-Zadima road yanglushiba mapa metenzük tashi iba tenokdangba alitsü ajisüaka iba tenokdangba kübok police, medical services aser para military madener ta parnokisa metetdaksü.

Nagaland RMSA-2016 tesayurtemi anogo 6 lungkak aiter; NSFtebang ayir

Kohima, September 15, 2025 (TYO): Nagaland RMSA-2016 Batch tesayurtemi tanü agi anogo trokbuba lungkak aiter aser parnoki tanü-a sorkar dang temeten meshia ayimtenogo.

2022 nung High Court-i tetuyuba agütsüba ama tesayurtemi sorkar dang scale pay, regularization aser state cadre nung dendaksütsü akhanger. High Court tetuyuba ya taküm May ita Supreme Court-ia pusema nungitogo aser state sorkari agütsüba Special Leave Petition magizük.

Ajisüaka, Brihostibarnü Department-i Association lennirtem den senden ka amendang August 14 nü 'Review Petition' agütsüba atema okadaki oshidang agütsüba ama inyaksü ta nangzük aser tesayurtem dang mapa inyaksü mepishi.

Ajisüaka tesayurtemi temepishiba magizük aser Honibar o Deobar sodi agir tanü nungi maneni lungkak aiter.

Tanü tesayurtemi "Obey the court, respect the law", "Review

petition, rest in peace", "We want justice", "Who will win, Teachers will win", "Corruption, corruption, by Government", aser "Teachers' right, we will fight" yimyimtem ayima lungkak aita liasü.

Külen, Department-i Honibarnü lungkak aitertem anema 'No work, No Pay' tetuyuba agütsüogo saka RMSA-2016 Batch tesayurtemi ibaji magizük.

Department-i NRMSATA-2016 batch tesayur trok atema transfer order agütsü saka President Imlitemjen Imchen-i tanü "sorkari iba ya kija dak tenük yoka inyakba lir" ta aitsüogo.

"Onoki iba transfer order magizüker aser tangsa meyipa agitsüla" ta Imchen-i ashi.

NRMSATA-2016 batch tesayur 367 prongi sign asüba shidi ka State Mission Director nem agütsüogo ta paisa ashi.

Commissioner & Secretary level nung Brihostibar senden amenba sülen sorkar nungi osang kecha lir mali ta asüngdangdang

"sorkari tang tashi nung osang kecha mali" ta President Imchen-i langzü.

"Onoki tanü mesüra asüng nungi lumia lungkak aittsü tebilemba liasü saka Naga Students Federation (NSF)-i tiyongsü nung mapa inyaksü merangba ajanga thinena atar" ta NRMSATA spokesperson Renbemo L. Patton-i ashi.

NSF-i tangatettep kati arutsü teimla nung Mongulbarnü School Education Advisor den senden ka amentsü ta Patton-i ashi.

Onoki lungkak aita arudang külem tesayurtemi timtem jenti ajurua arur, karbo kinunger asüba tensa ajuru aser kar tepok nung tanur bena aliba endoktsüsa tia ajuruogo ta Patton-isa ashi.

Taoba Bodbamü Chief Minister nem formal memorandum agütsüogo aser iba nung onok takhangba onüktem nenshiogo ta President Imchen-ia ashi.

"Sorkari kaketshirtem atema atangji aria bilemtsüra, tesayurtem asoshi bilema inyaksüla" ta paisa ashi.

NSDMA rongdak senden ayonga amen

Dimapur, September 15, 2025 (TYO): September 15, 2025 nü New & Renewable Energy, NSDMA Advisor Z Nyusietho Nyuthe-i line department ajak den rongdak senden ka ayonga menogo.

NSDMA Conference Hall, Nagaland Civil Secretariat, Kohima nung ayonga amenba senden nung tzunglu aruba ajanga gari lenmangtem aser kiojentem raksaba onüktem benoka lemsatep.

Iba senden nung Public Works Department (Roads & Bridges) (National Highways), the Water Resources Department, the Public Health Engineering Department (PHED), Commissioner of Nagaland, District Disaster Management Authorities (DDMA) aser NHIDCL ketdangsurtem aden.

Advisor Nyusietho Nyuthe menden ser amenba senden nung

lendong atalokba osangtem aser action taken reports lemsatepa liasü.

Chumoukedima, Meluri, Kiphire, Noklak, Dimapur, Shamator, Mokokchung, Kohima aser Peren nung anentsüh, tzümetzüng, kiojen aser lenmang raksaba osang benden.

Anentsüh alua aliba tesemtem nung lenmangtem yanglutsü aser lendong atalokba tesemtem nung machinery talila agütsütsü atema Nyuthe-i ashi.

Paisa line departments tsüngda amaliteptsü aser Chathe o Dhansiri ayongtem nung water levels reprangtsü ashi.

Line departments aser NHIDCL-i Nagaland alinük den putepa maparen inyaksüla ta paisa ashi.

Joint CEO NSDMA Johnny Rongmei-ia Chumoukedima aser Peren nung Deputy Commissioner tem dang Sukhovi

-Mhainamtsi lenmang anepalutsü mepishi.

NH-29 nung anentsüh aludang Sukhovi -Mhainamtsi lenmang ajanga ang senzür ta pai ashi.

Rongmei-isa bangdakpurtem dang iba lenmang anepalutsü atema senotsü peria lezmüksütsü mepishi.

Paisa PWD nungi field officers, executive engineers, aser SDOs dang gari lenmangtem reprangdangtsü aser lendong atalokba tesemtem yanglushitsü ayongzük.

PWD, DDMA, aser tanga department tem tsüngda tesentaktep tajung yur inyaksangshitsüla ta paisa ashi.

Iba senden nung District Disaster Management Authorities (DDMA)-i Video Conference ajanga pei pei tesem nung teraksa ajuruba aser yanglushiba osangtem lemsatepa liasü.

Aongza Ward Mokokchung nung ki ka anenzüka ao

Mokokchung, Rongjui/September 15 (TYO) : Mokokchung nung anogo ishika tzunglu maneni dang aruba ajanga tesem tesem nung anentsü aluba osang aika dang lir. September 14 aonung tzunglu kanga dang sashi sashia aru aser ibaji ajanga aonung 8:00 ako nung Aongza Ward nung House No-290 Wb. Ayutemjen-er ki anenzüka bener alu. Iba tatalokba ajanga nisung yiruba aser tasüba kecha mali asü.

Ki kiburi ashiba agi iba lendong ataloktsü lia aoksa ka ki telungenji ola tapu balala adoka aliji anenshia ola tapu balala adok aser ibaji angashia parnok kidang nungi ayazüka ajen aser mapang tatsüka tsüngda nung dang kiji anenzüka alu. Ki room takdang pungo aser soroshiokba takdang ka liasü aser osettsüset aser aben süoshi kija magizükteti dang sen jenjang lakh 10 jungnua takoksa ajuruogo.

Iba lendong ataloker kelen

Neithozo, NCS, EAC (HQ), semdanga liasü aser EAC-isa kibur dang State Disaster Relief Fund nungi Administration office ajanga teyari meshia zülutsü lemsatep.

Aongza Ward nungi Mokokchung Minicipal Council Counsellor Imtiyapang-ia district administration aser State Disaster Management aser ano nübur ajaki iba mapang timtem mapang nung nübur ajaki teka songtoka yariteptsüla ta metetdakja ashi.

KABA-i Dibua yimdak medical camp ayongzük



Kohima Ao Baptist Arogo nungi medical team aser Dibuia Baptist Arogo deacon board külemi agiba noksa ka yangi angur.

Dibuia, Rongjui/Sept. 15 (TYO): Kohima Ao Baptist Arogo-i tenla tulu agüja Dibua yimtak Agape Medical Camp ka kanga takok ngua September 12 & 13, 2025 anogotem nung agiogo. Iba sentong nung Dibua aser temeket nung aliba Arogotem nungi shiranger aika arua teyari agi.

Iba Camp akadang Rev. Dr. Imsütoshi, Pastor, KABA; Dr. Imo (Camp Convener) aser Dr. Achila Lanu (Co-Convener) parnok asemi anir doctor 7, technician, nurse-tem aser teyariteper ajak agi parnok 26 aru.

Parnok asoshi chiyongtsü teperi aser shirangertem asoshi mozü teperi bener arua angati yaria liasü. Tenük majungertem mozü den nüngdakbapurtem nem nükraktsü (spectacle) angati agütsü. Doctor temya

Gynaecologist, Dental, Surgeon, Medicine aser Ophthalmologist item nung mongintem liasü.

Shirangertemi pelatepa jembidang ashiba kaji: "Onok kasa treatment atema Mokochung-i atu nung gari hire denerbo sen tajemba agia 10,000 bo endoktsü liasü. Saka KABA-i angati treatment aser angati mozü bener arua agütsüba den ozü Arogoi anebalua angati dang gari yokba agi iba temang reprangba ya takum nung temoatsü tulutiba ajangshiba ka lir," ta ashi.

Iba Agape Medical Camp nung shirangertem 320 shi yari. Camp tembanger tenüngsang agütsüba telongjem sarasadem agiba mapang, iba camp nung yariteper ajak dang pelaba Arogo aser yimten tenüng nung lemsatepa liasü.

Imo Aier, deacon, Dibua Baptist Arogo ajanga Arogo tenüng nung tepela o jembidang, "Kohima Ao Baptist Arogo-i tamang tulu agi Khrista-i nungloktsüba wadang nung tabensa mapa (Wholistic Ministry) inyakogo. Onok ama tezü nung alir shirangertem ngua yariba atema onok kanga pelar," ta ashi.

"Onok pelaba temulung nung masemer anungji iba tepela tamaisü nenok nem naroküm ka agütsür, tanü nungi onoki Kohima Ao Baptist Arogo dang 'GOOD SAMARITAN CHURCH ta ajatsü' ta pai shia liasü.

Iba sülen Tsüngremi maneni Pa tenyaba mapa nung KABA amshiang ta moatsüba sarasadem agia iba Camp tembanga liasü.

Chümoukedima nung District Level Orientation agi

Dimapur, Rongjui/Sept. 15 (TYO): Deputy Commissioner, Chümoukedima indang Conference Hall nung September 15, 2025 nü 'Aadi Karmayogi Abhiyan' campaign indang district level orientation sentong ka agia liasü.

Deputy Commissioner, Chümoukedima, Polan John, NCS ajanga iba sentong nung jembidang, iba orientation sentong ya Government of India ajanga sentong tasen ka tenzüka lir, kong inter-departmental convergence aser shilem agia sentong yanglua tribal area tem nung sorkar indang services agütsütsü asoshi linük tesem ajungalen campaign ka lir ta ashi.

Pai department shia schemes balala indang rasaa ashi aser ibai tribal nisungtem nem osang sangdongba aser

service agütsüba inyakyim ka lir ta ashi.

Iba inyakyim indang nükjidong tulutiba ya states aser union territories 30 nung aliba district 550 aser blocks 3000 nung tribal committed villages lakh ka nung 'committed change leaders' lakh 20 teyariteper nung India nung tribal nisung crore 10.5 ajungkettsü lir, ta pai ashi.

Iba sentong ajanga Nagaland nung aliba tribal household ajak nem housing, tzü temürek, solar, healthcare, education, skill development, financial schemes, SHGs aser digital tesendaktep agütsütsü, ta ashi.

Iba inyakyim nung State level Tribal Affairs Department ya Nodal Officer alitsü aser Deputy Commissioner tekolak sür sendaktepa aliba department 17 alitsü, ta matetdaksü.

Chümoukedima district nung

blocks asem aser yimtsüng 46 lir aser Block level Master Trainers ajanga October 15-18, 2025 anogotem yimtsüng ajunga nung orientation sentong ayongzüksü.

Pai sendaktepa aliba department ajunga dang iba sentong takok ngua inyaktsü asoshi lungjemer inyaktsü ayongzüka liasü.

SDO (C), Shreyansee Jain, IAS aser EAC, Chumoukedima, Seyie Pfukri nati Aadi Karmayogi Abhiyan indang tongmelang agi rasaa ashi aser Master Trainers temi PowerPoint presentation ajanga 'Aadi Karmayogi Abhiyan' indang tejangjaba nung lemsatepa liasü.

Iba sentong nung District Maser Trainers temi anir sendaktepa aliba departments, CSOs aser Area Administrative officers tem dena liasü.

EDTC ajanga trade license atema metetdaksür

Dimapur, Rongjui/Sept. 15

(TYO): East Dimapur Town Council jurisdiction kübok osettsüet bener arua ayokba wholesalers/suppliers ajunga dang EDTC office nungi trading license/Permit tejangja agitsü metetdaksür, ta East Dimapur Town Council sangdong ka

ajanga ashi.

Iba totuyuba sülen manidaker nem tapet temerenshi agütsütsü. EDTC kübok shishilempaba nung tzüzüng-ozüng shidak amshia ochishia alitsü mechi iba totuyuba ya agütsür, ta sangdong ajanga ashi.

Shamator nung District Level Youth Festival agiogo

Dimapur, Rongjui/Sept. 15

(TYO): Department of Youth Resources & Sports ajanga September 13, 2025 nü Cultural Hall, Shamator nung "Viksit Bharat @2047 and the Role of Creator Economy" omen kübok District Level Youth Festival ayongzüka liasü.

Shamator College nungi Sunso C ajanga declamation

tetoktepba nung takok angu aser sobaliba ken tetoktepba nung Christian High School-i takok ngia liasü.

Sobaliba tsüngsang tetoktepba St. Xavier Higher Secondary School-i akok.

Department tenüng nung District Sports Officer, Athrong Yimchunger ajanga shilem agiba lanurtem dang pelaba lemsatepa liasü.

BOW ajanga kentanabuba "God's Design" sayaogo



Kohima, Rongjui/Sept. 15

(TYO): Band of Worship (BOW) ajanga parnok asoshi ken tanabuba "GOD'S DESIGN" September 14, 2025 nü sayaogo.

Yimkhiung Baptist Church, Kohima nungi pastor aser züngsemtem dena sarasadem sentong ka agiba sülen iba music video ya parnok indang YouTube channel B.O.W Official nung premier süa liasü.

Iba sentong nung akhumdong ka ama Nagaland Bio Resources Mission (NBRM) indang taoba Chairman, L. Thronghokuu aden aser pai kentener telok nem tenüngsang agüja maneni

Tsüngrem asoshi ken atentsü ajungshia liasü.

Rachel, Associate Pastor (Women) ajanga iba ken meshiteta sarasademja liasü.

BOW ya Kohima nung 2017 küm tenteta mezüngbuba ken, Champion of the World mejema aten aser 15th Music Awards of Nagaland nung 'Best Gospel Song in English' sempet ngua liasü.

BOW nung züngsem ya Aro (Vocals), Sotsu (Keyboard), Sunep (Drums), Tsukhum (Bass) aser Luntsu (Guitar) alitsü.

Iba ken audio ya Infinite Studio, Kohima nung yanglu aser Video ya San Production ajanga yanglua liasü.

Longleng nung District Level Youth Festival ayongzük



Dimapur, Rongjui/Sept. 15 (TYO): Directorate of Youth Resources & Sports, Govt. of Nagaland ajanga NSS Wing, Yingli College, Longleng den lungjemer September 13, 2025 nü District Level Youth Festival 2025 ayongzüka liasü.

Iba sentong ya Borgohain

Hall, Yingli College nung agia o jembiba, sobaliba ken aser tsüngsang nung toktepa liasü.

Iba sentong nung Bautung Govt. Hr. Secondary School, Longleng; Orangkong Village Students Union aser Yingli College, Longleng nungi shilem agia o jembiba nung mezüng

jenjang Chuthai L Phom (Yingli College) aser tanabuba jenjang Denten Phom (Bautung Govt. Hr. Secondary School) ajanga angu.

Sobaliba ken tentepba nung mezüngbuba jenjang Yingli College 5th Semester Students aser tanabuba jenjang Orangkong Village Youth ajanga

angi.

Sobaliba tsüngsang nung Bautung Govt. Hr. Secondary School, Longleng ajanga mezüngbuba aser Yingli College, Longleng ajanga tanabuba jenjang ngutet.

Iba sentong nung Kiriahungle Haihing, Assistant Professor,

Department of Sociology, Yingli Colege, Longleng menden liasü aser Dhapne Chungphang, Assistant Professor, Department of Sociology, Yingli College ajanga melepzüng o jembi. Iba sentong nung NSS volunteers dena nisung 116-i shilem agia liasü.

DIMAPUR DISTRICT AO PENSIONER TELUNGJEM

SENTEP SENTONG

Anogo : 19th Sept. 2025 (Friday)

Mapang : 10:00 AM

Tesentepdak : DABA, TOWN FELLOWSHIP, KHER MAHAL

Sentong Anir : Wt. Akümla Imchen, Duncan

Onük Jembir : Wb. K. Temjen Jamir, Editor, Tir Yimyim

Sentong Tarensen

1. Telok Ken : No. 233 "Khrista Teka Nung Metaloker"
2. Sarasademtsü : Wb. N. Lanu Aier, Kimen DDAPT
3. Tayongzükbä O : Wb. L. Sosang Jamir (Rtd.) DC Judicial (7 minutes)
4. Temeja Ken : Lengrijan Ao Pensioners
- I/C. i) Wt. Asangla Aonokpu
- ii) Wb. Chubaangshi Mopungchuket
5. Onük : "Shi aser Tanela nung teintet rogo khümkhümshiba" (25 minutes)
6. Tepela aser Melepzüng O : Wb. Imti Lkr. President DDAPT
7. Tatem Sarasadem : Telok

METETDAKTSÜR

1. Aor Pensioner/ Family Pensioner ajak iba Sentep Sentong nung kirep arua adentsü ayongzüker.
2. Sentong temer lokti süngo ajemba mapang alitsü.
3. Iba sentong takok aser temoatsü asoshi sarasadema atadi.



September 15, 2025 nü Mumbai nung Gujarat Angh, Acharya Devvrat-i Maharashtra Angh repsema inyaksü atema tenangzükbä agidang tangokba noksa nung angur. Kasa noksa nung Maharashtra Chief Minister Devendra Fadnavis aser Deputy CM, Eknath Shinde nata angur.

Ozüng alema inyakba putetra

SIR mapatong nokdangtsü: SC

New Delhi, September 15 (Agencies): Hombarnü Supreme Court-i, Election Commission of India (ECI)-i Bihar nung electoral roll yanglushitsü atema benokba Special Intensive Revision (SIR) inyakyim nung tashishitsü lira iba mapatong ya nokdangtsü, ta metetdaksü.

Justices- Surya Kant aser Joymalya Bagchi nati akümba bench-i maneni iba ken o ya October 7 nü angadanga sülen obendang agütsütsü.

Supreme Court-i, Election Commission-i özüng kübok iba mapatong (SIR) benoka inyaka alitsüa akok, ajisüaka iba mapatong nung linük temzüng dak mapetba lira iba mapatong ya Bihar nung dang masü saka linük tesem ajaklen nokdangtsü, ta metetdaksü.

"Bihar SIR atema onoki agütsüba obendangji India tesem ajaklen atema asütsü. Bihar SIR dak sendakba nung dang obendang agütsüba masü

saka tatembangbuba obendangji linük tesem ajaklen atema asütsü," ta bench-i metetdaksü. Court-isa, SIR anema ken o benokertem dang October 7 nü ken o angadanga mapang nung Bihar atema dang masü saka linük tesem ajaklen SIR atema-a ken o jembitsüla, ta shiogo.

September 8 nüa iba ken o angadanga mapang nung Supreme Court-i, Aadhaar ya senso atema kulikaket masü saka voter roll nung tenüng zülüoktsü atema Aadhaar ji-a docunt ka ama agizüktüsüla, ta metetdakja liasü.

Hombarnü ken o angdanga mapang nung senior advocate Gopal S-i, "Mezüng bushisüngdanga ajanga linük temzüng alema inyakba putetra onoki maneni iba inyakyim (SIR) nokdangang ta akhangtsü. Iba özüng dak sendakba nung Eelection Commission ken o-a angadangang," ta metetdakja liasü.

Ireland nung India nunger amakba tebilemtsü sorkari lemsatep

New Delhi, Rongjui/ September 15 (Agencies): Tawa Ireland nung India nungertem kanga amakba tebilemtsü onük India sorkari Irish Human Rights and Equality Commission (HREC) den lemsatepogo, ta ketdangsertem osang ka ajanga metetdaksü.

India sorkari Ireland ketdangsertem dang Ireland nung aliba India nunger sensotem kümzüka alitsü atema inyakdaksüner, ta metetdaksü.

"Tan hopta tetenzüklen Indian Ambassador, Akhilesh Mishra-i HREC Chief Commissioner, Liam Herrick ajurua tawa Ireland nung India nungertem kanga amakba

tebilemtsü onük lemsatepogo aser Ireland nung India nungertem taküm aser temeden kümzüka alitsü, iba denji külemi tangartema ajak kümzüka alitsü atema telemtetba agia inyakdaksüner ta shiogo," ta ketdangsertem osang ka ajanga metetdaksü.

Ajioda Herrick-ia Mishra dang item ama tatalokba nokdangtsü atema telemtetba agiba aser mapa inyakba tesemtem, schools aser tesem balala nung kin nung ajemdaker inyakba tatalokbatem nokdangtsü atema telemtetba agia inyakba metetdaksüogo.

"Pai akokba tashi Indian Embassy aser Ireland nung

aliba India nungertem den amalitepa alitsü ta shiogo. Paisa Ireland nung India nungertemi rongsenketzüng ainba nung shilem agiba, technology, healthcare aser sobaliba nung shilem agiba atema pelaba lemsatepogo," ta ketdangsertemisa metetdaksü.

Tang Ireland nung India nunger 80,000 shi lir; parnok rongnung NRIs 40,000, PIOs 33,898 aser kaketshir 10,000 shi lir. India nunger teimbaka healthcare, IT, engineering aser management nung inyaker. Ireland nung India nunger kaketshirtemji aika postgraduate, doctoral aser post-doctoral studies agirtem lir.

Bihar election jakdang AIMIM-i opposition INDIA nung adentsüa akok

New Delhi, September 15 (Agencies): Hyderabad nungi MP, Asaduddin Owaisi-i aniba AIMIM party-i Bihar nung election agitsü mapang ana nung lia opposition INDIA teloktep nung adentsü atema inyaksangshidar.

Talisa AIMIM-i secular votes angutsü atema Muslim nunger nütsüng aika aliba Seemanchal region nung rangloker. 2020 küm Bihar assembly election nung AIMIM-i menden pongu nung takok ngua liasü aser taruba election nungbo menden aika nung takok angutsü nükjidong yur jembia inyaksangshidar.

AIMIM-i RJD tongti lenir, Lalu Prasad-a ajurutsü

merangogo, ajisüaka RJD aser Congress lenirtemi AIMIM ji agizüktüsü asü magizüktüsär tang tashi nungbo mejangjar.

Bihar nung constituency 47 nungbo Muslim nunger nütsüng aika lir. Bihar nung AIMIM jenjang tajungba aküm nunga ibaji opposition atema maongka asütsü saka iba nungji timtem-a lir. AIMIM-i parnok INDIA teloktep nung magizük nungbo parnoki third front ka ama tokteptsü, ta metetdaksüogo.

November ita nung Bihar nung assembly election agitsü lia opposition party temi parnok tsüngda vote melemsatsü atema secular front ka tentettsü meranger.

INDIA teloktep nung adentsü tebilemba lemsatapa AIMIM Bihar unit Tir, Akhtarul Iman-i, "Onoki secular votes ya melemsadaksüner," ta sangdongogo.

Paisa, INDIA teloktep nung magizükra parnoki menden 100 nung tokteptsü, ta metetdaksü.

Osang angazükba agi, AIMIM-i Seemanchal region nung menden trok densema menden aika nung tokteptsü meshir, saka RJD aser Congress lenirtemi memelunger.

2020 küm election nung AIMIM-i menden pongu nung takok ngua liasü saka MLA pezüibo party toktsür RJD nung aden.

1974 nungi tenzüka longkak

aitba ajak bushisüngdangtsü tuyur

New Delhi, Rongjui/ September 15 (Agencies): Union Home Minister, Amit Shah-i Bureau of Police Research & Development (BPR&D) dang, linük nüchiso anguba sülen nungi, talisa 1974 küm nungi tenzüka longkak aitba tatalokba ajak bushisüngdanga sülen standard operating procedure (SOP) ka renemang, ta tetuyuba agütsüogo.

Senotsü dak sendakba lenla bushisüngdangtsü, longkak aitba ajanga telangzüba angubatem aser longkak aittsüsa ajungshirtem kuli jangjatsü atema iba tetuyuba agütsü.

July ita nung Intelligence Bureau-i anogo ananü 'National Security Strategies Conference 2025' ayongzüka agiba mapang nung iba tetuyuba agütsü.

"Longkak aitba yimya, longkak aitba ajanga telangzüba angubatem aser longkak aittsüsa ajungshirtem indang kuli jangjatsü atema BPR&D dang tuyuogo. Tarutsü nung item ama longkak sashia aitba nokdangtsü atema iba study nungji ajemdaker SOP ka renemtsü atema tuyuogo," ta sorkar ketdangser kati metetdaksü.

Union Ministry of Home Affairs-i iba atemaji maparen tenzüka team ka tentetogo aser iba team jagi state police


departments den yaritepa tejen file ajak kakteta reprangtsü.

Amit Shah-isa iba team dangji Enforcement Directorate, Financial Intelligence Unit-India aser Central Board of Direct Taxes-a anioka item longkak aitba dak sendakba nung senotsü indokba lenlatem-a bushisüngdangtsü tuyu.

ED, FIU-IND aser CBDT danga mejangjaba kiralongrar networks, parnok tesendaktep aser inyaksangshi bushidanga senotsü dak sendakba ochimashi bushia SOP ka renemang, ta tuyu.

Union Home Minister-i National Investigation Agency (NIA), Border Security Force (BSF) aser Narcotics Control Bureau (NCB) danga Khalistani tebilemtsü aser Punjab nung özüng alema inyakba tebilemtsü atema temeja asalentong yangluang, ta tuyu.

Osang angazükba agi, Home Minister-i state police departments den yaritepa inyakba BPR&D dang yimsü dak sendakba sentong balala bushisüngdangang, aser lokti tulu adenshidak nisung ajemsetba tatalokbatem nokdangtsü aser lokti tulu achaayangtsü atema Standard Operating Procedure (SOP) ka renemang, ta tuyuogo.



New Delhi, September 15, 2025: Doordarshan 66buba Foundation Day anogomong nung New Delhi nung taoba mapang Union Minister of Parliamentary Affairs Ghulam, Nabi Azad aser Indian television journalist, Salma Sultan na den tangartemi 'Doordarshan Diaries: The Golden Era of Television' kakat sayatsüdang tangokba noksa nung angur. Iba kakat ya Sheila Chaman-i züluba kakat lir.



TIR YIMYIM YIMOBILEM (EDITORIAL)

DIMAPUR TUESDAY, SEPTEMBER (RONGJUI) 16, 2025

Sen-dependence nungi Independence!

Asenok India yimten kübok nungi pilaa 'Independence' sa alitsü asoshi meranga aruer, joko, küm noklang jungdi asür saka asenok jakla yimya, libaliru aser mapa inyakyim agi 'Independence' bushirtema memesük 'Sen-dependence' bushirtemang mesüka kümogo. Anungji, tamasa India nungi masü saka asenoksasa asenok 'Sen-dependence' nungi 'Independence' angutsü nüngdakba tesemtem aika lir. Item tesemtem rongnung asenok taküm alitsü asoshi chiyongtsü atema tangar lu nung nendaka (depend-sa aliba) nungi Independence ngumatsüla. Ano, election mapang nung pei vote ayokba aser ochimashi mapa inyakbatem nungia 'independence' angutsü kanga nüngdaker. Ibaji dang masü saka ano asenok gari lenmang tamajung nung senzüdaktsüba mapa nungia 'independence' nüngdaker. Aji oda, government-i mapa inyakba yari taa aser tajangzük lema agitsü asoshi agütsüba mapatem meinyaki sen lema agiba sobaliba nungia asenok 'independence' angutsüla. Ibaji dang masü saka ita sen tilaka chia alitsü atema yimten nunga aser arogo nunga tiyazü jembiba nungi 'independence' bushitsüla. Independence tetezü tangar teyari aser temelaba medeni peisasa telemtetba agia aliba taküm, lokti aser yimten. Iba ama tesadok aser peisasa taküm litetba taküm aser kin ka akümtsübaji tangar nem mesüdakjabo mekümtettsü aser kar takar kümnü dang nübortem lenmang tamajung nung jajadaktsüba limaji ano 'independence' angutsü asoshi lenmang talangbaleni mekena bener aoba mapa ka asütsü. Atangji, tanü lima nung kija süli, lokti aser yimten süli tangar teyari magiibo melitettsü, kechiyong ka akaba ka maka aser ka makabaji ka ket nung kar, anungji shishilembaba mapa nung asüyonga, yaritepa nung asüyonga nisung o nisung na aser alima o alima na yaritepa alitsü nüngdaker. Ajisüaka, kin ka ket nung ajak kar aser kin ka ket nungbo kecha maka ta süra kin ana tsüngdajibo yaritepa melitettsü saka takabai makaba yaritsüsa akümtsü. Anungji, alima nung nisung o nisung na süli mesüra kin o kin na süli yaritepa 'Interdependence' süa alitsü asoshi nisung anapronglaji mesüra kin anapronglaji 'independence' jenjang nung aliba nisung aser kin asütsüla. Ajisüaka, tanü asenok Naga nungersa asüyonga, Nagaland nung alirtem yabo 'suwar' amai dang, asenok tangutsü ka mangu ser tim atemyonga ola madoker, anungji asenoki kodaser tangar ola madoktetertem yaritettsü? Aji oda, asenok tangar lu nung züsentetba chiyonga taküm alir, anungji asenoki 'independence' otsü jembiba ya yangji tsükdaker. Joko, tanübo Kohima nung Independence masü saka tesayurtembo pei tangutsü tim ita asen meshir aser Nagaland anüdoklena kaketshirtemi tesayur shitak yoktsü akanger ta India-i masü saka asenoki inyakttetsüba aser agütsütetba mapatema dena meinyaktet kümogo. Iba jagi asenok ya 'Independence' bushia bushia 'dependent' kümogo aser dependent jenjang nung ali tashi asenok independence mangutsü. Aji oda, independence o Independence nabo interdependent sütettsü saka 'dependant o dependant' nabo interdependent-a mesütettsü. Kasaji, asenoka India aliba agi alir, yamaji maparen aser nüngdak kar nungbo India-a asenok aliba agi alitsüsa asenok dak tashi alitsüla. Ajisüaka, India-i asenok asoshi sen yokli, ibaji shibai kong kechi koma amshiar memetet, pei lima agi peisasa nümamedangtetsüsa gari lenmanga tamajung nung jajadaktsüli, kaketrejutema anepalu mesütet tazünger maliba maliba kümdaktsüli aser yimti yimdong dena moktetsüsa janaona agi süngdaktsüli ta asüba lima nung alir sensosangertemji nüchi nisung masü saka sowartem lir, anungji parnok jagi parnoksa pei asoshi dang bilemba shisatsü aser tokolok tilaji uludakja memelenshi tashi 'Independence' lima mekümtettsü. Aji oda, senbo meimer saka pei lima memeimer ta asüba purtem jagi 'Independence' mengutettsü, kechiyong parnokji sen lar, 'Sen-dependant' lir. Iba nung jagi asenok nüchi küma adoktetsüla aser sen-dependant masü saka shitakba 'independence' asoshi inyaktsüla. Idangjibo, pei lima meyong sen agia aliba to, pei sen agi pei lima yanglu tenzüktsü. Ajiang shitakba 'independence' angur asütsü.

OLEMSABANG

Kasa Taa, Ochi aser Tangatetba Tajung nung Yimsüsüba aser Tarutsü Shisaliok Tia

~ Arenla Tzudir

Linuk ka nung Yimsüsüba tajung aser terenlok aliba ji rongsen ketsüng ainba kisüng masü saka ochi aser tangatetba tajung agi yimsu asübaji liraji Sorkar kobai pei nüburi mezüng tongtipang südaktsür, mapa talang agütsüteter aser senso ajak tebendang melii kasa ochi nung amshiteter.

Nagaland RMSA-2016 tesayurtemi longkak aitba ya ano kobika aotsü iba indang tejangja tatishitsü ka lir. Item tesayur telok ya tatidang aser tebendangba shidak den tenüngdakba qualifications ajak peria lia takok angurtem lir.

Parnok mapai aibaji tajungtem rongnung tajungtiba shima ai, saka parnok züdoka doktsüba, bendangbenjia amshiba aser ochi temeten munguteti tuoshia rokongdaktsüba telok lir.

Supreme Court of India ajanga mapang aben, kesa mapa asoshi kesa taa ta ashiba ya takhangba ka dang masü, saka Constitution-i melaba ka lir. Item teteyuba dakji ajemdaker Nagaland sorkari "contract" nung alirtem "regular" kümja taa talangka agüja arur. RMSA-2016 Tesayurtembo züngdoka doktsür, teimla makai tekolok animesüngzükteti, itasen tila ngua alibajia lawyer taa nung agütsütsüsa tensa agi bener arutsür. Aji saka Obendangdak balala nung parnok nem temeten agüja ka sorkari parnok nem tanü tashi temeten magütsüi lir.

Tesüngmangtsüka, taküm tesayurtem anogo nunga "Tesayur temi alima yanglur" ta O agibo jembiba, saka tarutsü alima, yanglutsü nüngloktsüba tesayurtembo yamai nemja, luja amshidang, parnoki jembiba O ajanga kechi osang agütsür?

Linük ka ama asenoki renloka onüra sorkar mapa inyakertem talisa tesayurtem kanga junga shimtsü, amshitsü aser züngshitsü bilemtsü tenzüktsüla. Aji asünung dang asenoki ajak asoshi linuk ka, kong nüburi ajak tebendang makai züngoka, ajaki shilem agitetba linük ka yangertettsü.

Item tesayurtem sorkar mapai aiba ya temalen ashiba ama shimtetba tem lir. Anungji parnok yaang nüburi shidakba nüngdakba tesayurtemji lir masü noh? Mongintem shirnoki ochi aser temeten sayutettsü purtemji parnokmasü noh? Kechiaser parnoka kesa ochi aser tim yimya nung mapa angubatam lir.

Lokti ajak nung tesayurtemji tongdi shilem agirtem lir. Parnoki kija taküm dang masü, saka linük ka tia yanglutsürtemji lir. Saka asenoki parnok nem agütsütsü langa aliba akhüm tetushi aser temeten magütsütetra asenoki asen tarutsü tia tamendakdak raaksar asütsü. Parnok asoshi temeten akhangbaji tesayurtem kisüng asoshi masü saka ibaya ochi aser tangatetba tajung, ajak asoshi kesa maangka aser linük shidak yanglutsü asoshi tajaba lir.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Pope Leo-i Aso 21buba nung Khrista atema asürtem nem akhüm agütsü



September 14, 2025 nü St. Paul Tenla kidang Pope Leo XIV-i leniba nung Aso 21buba nung pei tamang atema asür Khristantem aser Khrista atema kulisüdang asürtem nem akhüm agütsüdang tangokba noksa nung angur.

Rome, September 15 (Agencies): Amongnü Pope Leo XIV-i Aso 21buba nung pei tamang atema asür Khristantem aser alima tesem balala nung Khrista atema kulisüdang asürtem nem akhüm agütsüogo.

Khristantemi pei tamang jenjang manokshii tasü aitba atema pai asürtem nem tenünsang agüja akhüm agütsü. Paisa, alima tesem balala nung Khristantem teimba-teimba dang tepseter, ta ashi.

Vatican-i ashiba agi, 2000 küm nungi tenzüka Islamic kiralongrartem, Amazon Ranchers aser ozüing alema inyakba telok balalai Khrista atema kulisür 1,500 dak tali tepsetogo.

Khrista atema asürtemji teimbaka Sub-Saharan Africa nung lir (nisung 643).

Alima tesem balala nung Khrista atema asürtem osangji Vatican-i bendena arur. Iba ya parnok nem 'sainthood' agütsütsü atema masü saka parnok bilemtettsü atema lir.

Khrista atema asürtem nem akhüm agütsütsü atema sentong ka ayongzüik aser iba sentong nungji adentsü atema Khristan denomination 30 nungi lenirtem aser putirtem jaoka liasü.

Iba sentong nung jembidang Pope Leo-i, "Tanü-a asen aianu aser adianuatem aikati tensa tamajung nunga pei tamang jenjang kulisüa asen Kibubai apuba kasa Kangki apua arudar. Asen Kibuba ama parnokia reshikangshi ajurur, aitsür aser tepseter," ta metetdaksü.

Küm 25 tejaklen Rome nung aliba Colosseum nunga St. John Paul II leniba nung küm 2000 Jubilee amongba mapang nung Khrista atema asürtem nem akhüm agüja liasü.

September 14, 2025 nü St. Paul Basilica nung agiba sentong nung Leo-i tatishitsü kar lemsatepdang pai, America tsür nun Sister Dorothy Stang-i Amazon rainforest wazüka ayutsü aser yangji alir sensakertem temeden kümzüksü atema küm 30 tashi inyaka aruogo; 2005 küm Amazon Ranchers-i la khaseta liasü, ta metetdaksü.

Leo-isa, "La tepsettsüpurtemi la dang hadir asüngdangba mapang nung lai la ket nung aliba Laishiba sayua 'iba ya kü hadir lir' ta langzüa liasü," ta metetdaksü.

Pope Leo-i, akhidang nungi Khristantem jenti reshikangshir aser tepseter, 1900s mapang nung kijai tashi alia yimsüsüba anenogo, ajisüaka tanü tashi Khristantem jenti tepseter, aser tesem kar nungbo akhidang nungi tang teimba tepseter, ta ashi.

2023 küm tentetba Vatican study commission-i ashiba agi, 2000 küm nungi tenzüka Khrista atema tepsetba Khristan 1,500 dak tema lir; item rongnung 2015 küm Libya nung Islamic kiralongrartemi tepsetba Egypt nunger Coptic Orthodox Khristan 15 densema lir.

Commission-isa ozüing alema inyakba organization balalai Khristantem tepsetba osang metetdaksü.

Commissions nung vice president, Andrea Riccardi-i, tang tashi nungbo Khrista atema asürtem tenüing ajakji

onoki mesangdongtsü, kechiyong aliba tesem kar nungbo security dak sendakba tebilemtsü lir, ta metetdaksü.

Riccardi-i, Khrista atema asürtemji sub-Saharan Africa nung teimba liasü; yangji Islamic kiralongrartemi Khristan 643 tepset, ta metetdaksü.

Asia aser Oceania nunga Khristan 357 tepset, aser parnok rongnung 2019 küm Sri Lanka yimtiba, Colombo nung Easter Sunday tekülem sentong nung adenba mapang bomb lendong nung pokseta asürtem densema lir.

America nunga Khrista atema asürtem 304 liasü aser parnok rongnung missionary tem aser Amazon forest wazüka ayutsü atema inyakertem densema lir.

Midde East aser North Africa na nunga Khrista atema asürtem 277 liasü.

Europe nunga Khristan 43 aser alima tesem balala nung asür Europe nunger 110 liasü; parnok teimbaka missionary putir aser nun tem liasü, ta Riccardi-i metetdaksü.

ANOGO ABEN TSÜNGREM DEN

Ejip nung metsü aser tesangwa (T.ken 105:24-45)

Mosa aser Aaron mapang na Ejip nung ali asübo Farao chuba tekong merangba ajanga Ejip limai wara yokba nung na densemer lila. Yihuda nungeri Ejip toktsüdang naia kechi shir lila? Ken züluri ya zülü, "parnok aenshia aodang Ejip pelaa liasü, kechiyong parnok madak tetsübu agi tonga liasü" (t.38). Kodang Tsüngremer nisung alima nungi piladir, kodang asen Kibuba tanaben arudir, alimai pelatsü.

Ejipji alima noksa lir. Tsüngremer (Israel) asoshi, ibai alar lima aser anisüngzüik maka mapa inyakdak lir. Ibai tapung lima. Saka Kanan limaji lenten, tenem aliba lima, tsünglu aser süngjang teperi aliba lima, mamatzü aser ninang mochitzü ayimdak lima. Kodang na kümzüka lidir, tanelaren Tsüngremi na Ejip nungi anitettsü. Pai na Kanan nung yutsütsü aser ashitsü, "item temoatsütem ajak agiang."

Kechiba Israeli Ejip toktsüdang Ejip pelaa liasü? Tejangja kuli kaji- Ejip nunger tsübua liasü. Israeli chichiba Tsüngrem külema liasü, aser parnok Tsüngremi wara ajanga Pa ain sayu. Israel nungerji Ejip asoshi minprongtsü ka liasü- zübu nung metsü ama, tajung jungkai adoktsüba tesangwa ama. Ejip nung kuli asütsü Tsüngremi Israel amshi,saka Ejipi magizük.

Khristantemji metsü aser tesangwa lir. Ken ken asenoki nisungtem maginer: ken asen libaliro ajanga taiji tutettsür. Asenoki item anogotemji ajangtsü. Ibaji tanüa asütsü akok. Yisu Khrista tanü arutsü akok aser Pa pur sentsüwangshi kidangi anir aotsü akok. Joko metsü mali. Tesangwa mali. Saka kechi? Obendangba. Asen Kibuba aru ataba mapang asenok teinyaktsü mapa lir ta asenoki bilemtetdi.

Arogo teinyaktsü mapa kaji alima mitsü aser alima tesangwa ama alitsübaji lir. Ken ken nai ibaji memeteti tangar yirutsür. Ken ken Khrista indang tangar dang ashitsü mapang tajung angur. Arogo ne mapa nung metsü aser tesangwa ama alitsü nai bilemtsü akok asü? Kar asoshi tanü ne taküm balaka alitsü Tsüngrem dang asüngdangang.

sentong agia liasü, aser iba mapang nungji pa-a arutsü amai onoki bilema liasü," ta metetdaksü.

Pastor ajungbena asüba ajanga Arogo nung züingsemtem dang masü saka Ramona jila nung alirtem ajak aoksatepa mangyimer.

Pastor Ascensio'er medemer, Francisco Tomas-i, timtem mapang ajak nung Ascensio-i pa yaria liasü, ta ashi.

Arogo nung züingsem, Jesus Flores-i, timtem mapang ajak nung pastor-i pa nungita yaria aruogo, ta ashi.

Ascensio-i pa kinüngtsü den tanur ana toktsür pilaogo.

Arogo nung züingsem kati, "Pai asenok nem tatishitsü tajung yutsüogo, anungji asenokia ibaji benshia kati ka meimteptsüla. Pa ya tembar tajung ka, kinüngbu tajung ka, tebu tajung ka aser pastor tajung ka liasü," ta metetdaksü.

Par kibong yaritsü atema

Arogoi GoFundMe campaign ka tenzükogo.

Iba campaign organiser-i, "Ramona nung alirtem, tang ama timtem tulu aliba mapang ka nung asen aianu, Abigail tenüing nung onoki ya mepishir. Yangli Ramona nung la kinüngbu, Mount Horeb Arogo nung pastor aser tanur ana tebu, Felepi asüba ajanga la melung kanga raksaogo," ta metetdaksü.

"Iba tatalokba dak sendakba nung senotsü teindokba menoktsü atema onoki teyari agüjang ta mepshir. Iba takoksa ajanga par kibongi khuret tulu ajuruogo. Nenoki melungba tenla kechi agütsüdir ibaji ajanga par kibong nem tesünep agütsütsü," ta parnokisa metetdaksü.

"Nenoki temeim sayuba, sarasademtsüba aser tenla tajung agütsüba atema onok melungjang taroktiba nungi nenok ajak dang pelar," ta parnokisa metetdaksü.

California nung nisung kari pastor Felipe Ascencio khaset



Pastor Felipe Ascencio'er kibong noksa nung angur.

September 15, 2025: California kübok San Diego County nung nisung kari pastor ka khasetba sülen iba tatalokba bushisüngdang tenzükogo.

Iba tatalokba dak sendakba nung temelung melemi nisung ka pua lir.

San Diego County Sheriff Office ajanga, Amongnü (September 7) nikongdang Ramona nung Pastor Felipe Ascencio par kidang lia khaset,

ta metetdaksü.

Tang tashi nungbo police-i temelung melemi pua alisang tenüngji memetetdaksür.

Ascensio ya Templo Monte Horeb Arogo nung pastor teinyakdak liasü. Pa ya pastor ka, tesayur ka aser counselor ka liasü.

Par Arogo nung züingsem, Miguel Hernandez-i, "Iba osang ya onoki mamangteteti liasü. Bodhbarnüa onok tekülem

AO OSHI ANGAZÜKDAK:**TANÜ ANGAZÜKTSÜBA OJANG****Teyari**

(v) Temeim agi agütsüba, mapa nung nungitba (help)

* Tzümetsüung nung timtemertem teyari nüngdaker.

Teyari

(v) tindang, tapet, shitak (suitable, right size)

* Kübui kü nem tula teyari ka alia bener arutsü.



Tir Yimyim

OLONG PAITEP # 7272

	1				2	3			
4			5						6
						7			
	8								
	9			10			11		
						12			13
14									
						15			

TIPIEN

2. Sü jeplok - (4)
 4. O agi merenshi - (5)
 7. Ayongküm li - (5)
 8. Chiyungtsü mapang süiadok - (4)
 9. Tsüngrem den jembiba - (9)
 12. Saklok - (4)
 14. Samaba mebushitet - (5)
 15. Mejanga onü - (5)
 16. Tzü shiruru ka - (4)

LANGTSÜNGLEN

1. ____ i - (4)
 3. Kasa masü - (6)
 5. Nüchi masü - (5)
 6. Tashi endok - (5)
 9. Langtem - (5)
 10. Anü malidang - (6)
 11. ____ kibur - (5)
 13. Tebur tembar tsüngda jatepba - (4)

OLONG PAITEP # 7271 TELANGZÜBA**TIPIEN :**

1. Semtu, 3. Lepko, 5. Bilem, 8. Ulu,
 10. Tsüngpang, 11. Tesangwa,
 13. Aoksa, 15. Putir, 16. Yipru.

LANGTSÜNGLEN :

1. Sayu, 2. Teb, 4. Kimong,
 6. Lungkak, 7. Milak, 9. Zünga,
 10. Temopu, 12. Walu, 14. Ali.

NHRC-i Assam DGP dang journalist amakba osang meshir**Guwahati, September 15,**

2025 (Agencies): Lumding nung journalist Sujit Sarkar dak teka sangshiba atema National Human Rights Commission (NHRC)-i ken o ka benokogo.

Sarkar dang Hari ta-a ajar aser September 7, 2025 aonung Lumding Railway Institute nung

iba lendong atalok.

Sarkar mapa nungi kidangi aodang nisung 20 shi kati pa dak teka sangshi. Parnoki pa züka merenshi aser gold chain, mobile phone, watch, o motorcycle auyaa bener ao.

Iba tatalokba sülen police tesem tonga ao aser journalist

kümzüik aser pa anepalutsü atema Lumding Civil Hospital-i anir ao. Ketdangsürtemi nisung ana dak asüngdangya asütsü sot aser First Information Report (FIR) ka benok.

NHRC-i iba atatalokba atema süoki ia bilemba metetdaksüogo aser iba ya human rights alema inyakba lir ta ashir.

Iba tatalokba atema media nisungtem aser nübertem jashiteper. Lumding Press Club den külemi sensotemi iba tatalokba khukhua aitsüogo.

Külen police ketdangsürtemi iba tatalokba atema bushisingdang sürar. Ajisüaka iba tatalokba mapang journalist ji yi jemer liasü südi ta ken o tem lir ta police-i ashi.

**GOVERNMENT OF NAGALAND
 STATE COUNCIL OF EDUCATIONAL RESEARCH AND TRAINING
 KOHIMA: NAGALAND.
 ADVERTISEMENT**

Dated, Kohima, the 15th Sept. 2025

No.SCERT /ADM/RECUIT/GR-3/2023/ As per the approval of the Government of Nagaland Vide letter NO. DSCERT/Drivers/1-5/2025/166 dated the 11th June 2025, applications are hereby invited from bonafide indigenous inhabitants of Nagaland for filling up1(one) post of Driver under the Department of State Council of Educational Research and Training (SCERT) Nagaland, Kohima. This is issued with the clearance accorded by the P&AR Department Vide U.O No. 288 dated 23/05/2025 and Finance Clearance vide RFC/ESTT.No.31/24 dated 02/06/2025.

Sl. No	Name of the Post	Number of Post	Pay Matrix
1.	Driver	1 (one)	Level-3

Eligibility Criteria

- Educational Qualification required will be Class 8 Pass and above.
- Age limit shall be Minimum 21 Years during the date of publication of advertisement and Maximum Age limit is 37 years, relaxable for Government employee equal to the number of years they are in service, subject to a maximum of 5 years.
- Documents required (mandatory).
 - Educational Qualification Certificate.
 - Birth Certificate
 - Indigenous Inhabitants Certificate, ST, BT Certificate.
 - Backward Tribe Certificate (if applicable).
 - Valid Driving License.
 - "No Objection Certificate" (NOC) from Head of Department with name and Official Seal, indicating the date of initial appointment of the candidate (if applicable).
 - Employment Exchange Registration Card.
 - 3 (Three) Passport size Photos.
- 5 (five) years driving experience preferred.
- Candidates will be assessed in the areas of General Knowledge, Driving Skills, Identification of Vehicle parts & Traffic Signals.
- Application forms will be issued in the Directorate of SCERT, Nagaland, Kohima or can be downloaded from the SCERT website (www.scert.nagaland.gov.in) from 17th to 30th of Sept. 2025.
- The filled forms should be submitted in person to the Directorate of SCERT, Nagaland, Kohima (Near Rüzühkhrie Government Higher Secondary School) on or before 10th of October 2025. Application form will not be accepted after the last date.
- After due scrutiny of all relevant documents, list of the eligible candidates will be uploaded in the SCERT website (www.scert.nagaland.gov.in) and Office Notice Board on 15th of Oct. 2025.
- Admit Card will be issued from 21st to 23rd of October 2025 during office hour. Date and time of the examination will be notified during the issue of Admit Card. An amount of Rs. 200/- will be charged as Exam fee at the time of issuing of Admit Card.

Sd/-**(KEVIRALE-Ü KERHUO)****Director,****SCERT, Nagaland Kohima.**

SWASTH NARI, SASHAKT PARIVAAR ABHIYAAN

(HEALTHY WOMAN, EMPOWERED FAMILY CAMPAIGN)

17th SEPTEMBER to 02nd OCTOBER 2025

Empowerment of Women for the Progress of our Families, Communities and the Nation at Large



- 17th SEPTEMBER :** National level virtual launch by **Shri Narendra Modi**, Hon'ble Prime Minister of India at **12:00 noon**, followed by State launch by **Shri Neiphiu Rio**, Hon'ble Chief Minister of Nagaland at Capital Convention Centre, Kohima. Inauguration of **Swasth Nari, Sashakt Parivaar Abhiyaan** in all Districts
- 17th SEP - 02nd OCT** Specialist Health Camps in all DHs, CHCs, PHCs, UPHCs and HWC-SCs across the State .

Visit your nearest Community Health Centre, Primary Health Center, Health & Wellness Center-Sub Center to avail these services.

FREE Health SERVICES

AVAILABLE DURING THE FORTNIGHT CAMPS ALL OVER THE STATE

- NCD Screening for major diseases** (Hypertension, Diabetes, Oral, Breast & Cervical Cancer)
- Anemia & Sickle Cell screening for women and girls.**
- Maternal & Child Health Services, Immunization**
- Nutrition, Adolescent health & Menstrual Hygiene.**
- Mental health awareness**
- Blood donation drives**
- PM-JAY & CMHIS registration**
- ABHA enrollment**
- Ayush health services**
- Screening services for Eye, ENT, Dental & Geriatric care**

FOLLOW US

nhmnagaland

@NagalandNhm

SKorea-i ayongzüka US, Japan den air & naval exercise tenzükogo

Seoul, Rongjui/September 15 (Agencies): United States, South Korea aser Japan nungeri air aser naval drills tenzükogo, koba North Korea-i aitsüogo.

"Freedom Edge" ta nüngja agütsür iba air & naval exercise ya South Korea kübok Jeju asetkong nung Hombarnü tenzükogo aser Hokolbarnü tashi agitsü.

South Korean Defence Ministry-i ashiba agi, iba exercise ajanga, North Korea-i nuclear aser missile agi amokmerenba telangzüba agütsütsü asoshi allies tem inyakyim tajungba akümtsü, ta Associated Press news agency-i metetdaksü.

Kasa mapang nung iba military exercise anema Hombarnü Seoul nung nüburtemi longkak aita liasü.

Deobarnü North Korea lenir Kim Jong Un adianu Kim Yo

Jong-i, South Korea, Japan aser US nunger inyakyim ya aija parnoki tesem tai nung parnok tashi sayur ta ashi.

Kim Yo Jong shiba North Korean governing party indang central committee vice department director lir, lai iba military drill yagi parnok akoksatsü ta amokmerenogo.

Taoba hopta teti Kim Jong Un-i weapon research facilities semdangogo aser Pyongyang-i ashiba agi, parnoki parnok indang conventional army aser nuclear programme tem ajungkettsü atema takaratiba inyakyonga aotsü.

Hombarnü United Nations dangi linük indang permanent mission-ia, nuclear hadir aliba state ka ama parnok jenjang melenshitsüji tamakoktsü ta shiogo.

Pyongyang-i, Seoul aser Washington na den nuclear atema sensaksemtsü asoshi

kecha tejangraba maliba lephsia metetdaksüogo. US tir Donald Trump mezüngbuba term nung nuclear atema sensaksem chirepba sülen tang tashi sensaksem magiteti arudar.

Noth Korea-isa, kümtem tsüngda Moscow den tesendaktep akangshiogo aser Ukraine den raratsü atema Russia-i sepaitem dena yokogo.

Parnokisa, China den tesendaktep tajung yua arudar, shirnok parnok asoshi shishilembaba tsütsü partner tulutiba lir. Iba ita tetenzüklen North Korea lenir ya China-oa China tir Xi Jinping aser Russia tir Vladimir Putin na den military parade ka nung shilem agia liasü.

Kim-isa, Beijing semdangba mapang Putin den senden ka amen aser Xi dang linük ana tsüngda tesendaktep kodanga memelenshitsü ta ashi.

Nepal PM Sushila Karki-i minister tasen asem shimogo

Kathmandu, Rongjui/September 15 (Agencies): Nepal tir Ramchandra Paudel-i Hombarnü caretaker Ato Kilonser Sushila Karki-i lar cabinet tasenba atema shimba minister asem tenangzüktepba agiba sentong achaayanga agitsüogo.

Arishi küm 73 tain Sushila Karki, shiba Deobarnü Nepal indang mezüngbuba Ato Kilonser aküm, lai minister mapa abentsü atema Kulman Ghising, Rameshwor Khanal, aser Om Prakash Aryal nunger shimogo.

Minister tem tenangzüktepba agiba sentong ya tir Office, Sheetal Niwas, Maharajgunj nung agia liasü.

Toba finance secretary Rameshwor Khanal, Nepal

indang finance minister kümogo aser taoba mapang Nepal Electricity Authority managing director Kulman Ghising-i energy, water resources & irrigation; physical infrastructure & transport aser urban development ta tongtibang portfolios asem agizükogo.

Kasa mapang nung Advocate Om Prakash Aryal, home affairs aser law, justice, & parliamentary affairs minister kümogo. Tir Office, Sheetal Niwas, Maharajgunj nung tenangzüktepba agiba sülen minister asempronglai pei mapa agizüka mapa tenzükogo.

Longkak aitertermi tuyuba sülen caretaker sorkar anitsü atema taoba chief justice Sushila Karki ya Nepal indang mezüngbuba tetsür Ato

Kilonser asütsü atema September 12 nü shima liasü, aser taruba küm March 5 nü election agitsü atema achaayangtsü nongloktsüogo.

Taoba Ato kilonser KP Sharma Oli-i mapa toktsüba sülen Nepal nung yimden yimsüsüba tsütsü ken o mejangjai aliba la shimba ajanga tembantsüogogo.

Linük nung social media nokdangba aser ochi mashi inyakyim anema lanurtemi anir longkak aitba mapang Oli-i Mongolbarnü mapa tokja liasü.

Longkak aitba sentong ya yimjung nung tenzük saka longkak aitertermi PM mapa nungi anentsü khanga pa indang office-i aiba sülen azütokshi lendong tulu ataloka liasü. Iba lendong nung nisung 72 asü.

Bolsonaro ken oya 'witch hunt' masü: Brazil Tir Lula



Brasilia, Rongjui/Sept. 15 (Agencies): Brazil indang taoba tir Jair Bolsonaro-i mitkar tashi amshia sorkar atsüngdoktsü merangba yong küm 27 dak tema tepuokdak ayutsü obendang agütsüba Brazil Tir Luiz Inácio Lula da Silva-i bhukuma ashi.

Pai bilemba New York Times nung adoktsüba nung, US Tir Donald Trump-i iba ken o ya "witch hunt" ka lir ta ashiba Lula-i magizük aser 'ibai otsüsütsü telemtetba lir, koba agi ozü institutions aser democratic

rule of law kumzüka ayur,' ta ashi.

Brazil leniri US Tir Donald Trump den temulung ajak rakpoka jembishinü akatsü asoshi iba essay ya zülü ta ashi, shibai Brazil nungi bener aruba osettsüset nung tariffs shilem 50 meshia lir.

Lula-i tariff tali meshiba ya lenmang meshidak nung anisaba kisüing masü saka tim masü ta ashir.

US aser Brazil tsüngta ita ishika tesendaktep mejungi arur, aser Brazil nung Jair Bolsonaro

Tesüiba küm 15 tsüngta linük ana shishilempaba nung US-i sen \$410bn (£302bn) ajangzükogo, aser tariffs meshitsü telemtetba agiba ya yimtenren tsütsü nungi dang lir ta pai ashi.

"Taoba tir Jair Bolsonaro memerenshidaktsütsü mechi US sorkari tariffs aser Magnitsky Act amshir," ta Lula-i zülü, koba Bolsonaro indang ken o jembir Supreme Court justice anema US-i sanctions agütsüba athishiba alitsü.

(Maneni tapak 8 nung...)

OFFICE OF THE
CHANGTONGYA YIMSEN STUDENTS' UNION
(Changtongya Yimsen Kaketshir Telungjem)
P.O : Changtongya - 798613
Dist. Mokokchung, Nagaland (India)

TENÜNGSANG AGÜTSÜR

Sp. Lanutemjen

Wb. Alemyanger Aier

Changtongya Yimsen kaketshir Telungjem ajanga lenla balala nung takok angur & tenüng tajung bentsür arur;

1. Wb. N. Temsu Longkumer & Wt. Aosenla jabaso **SP.LANUTEMJEN**-i Nagaland Public Service Commission ajanga agiba tatidang nung **SUB - INSPECTOR**, Home Department, Police Establishment Branch menden ngutetba asoshi tenüngsang & tetushi agütsür.
2. **WB. ALEMYANGER AIER** (Sungratsü) Teacher Incharge, GPS Changtongya Yimsen-i 64th Teachers' Day Sentong 5th September 2025 anogo Mokokchung nung amungdang, **"DISTRICT AWARD 2025"** anguba asoshi tenüngsang & tetushi agütsür.

Tsüngremi nena taküm maneni moaja asen neburtem tenzükba wadang nung azükarudakjangma.

Sd/-
(SP. IMLIMATSUNG)
President, CYKT

Sd/-
(KR. AKUMIENLA LONGKUMER)
General Secretary, CYKT

Government of Nagaland

Office of the Sub-Treasury Officer

Changtongya: Mokokchung

METETDAKTSÜR

Changtongya Sub-Treasury kübok Pensioner ajak 2025-2026 Period atema Physical Verification agitsü. Anungji agüja aliba anogotem nung kuli tabensa bener Treasury Office-i arutsü metetdaksür. Mapang 10:00 Am - 03:00 Pm.

a. Life Pensioners : 23rd Sept. 2025

b. Family Pensioners : 24th Sept. 2025

Sd/-
Temsupongla
Senior Treasury Officer

Office of the

Amenyong Youth Mokokchung

SANGDONGER

Mega Bumper Tambola, Amenyong youth ajanga koba 30th Sept. 2025 anogo nung ayongzüka liasu, ibaji mepaidoktetba timtem kar ajanga 2nd Oct 2025 anogoi melenshir.

Sd/-
Arenlong
President/8920718317

Sd/-
Dinuremba
Chairman/8787597209

Gaza rara nung Israel-US tesendaktep shidak lir

Jerusalem, Rongjui/Sept. 15 (Agencies): United States Secretary of State Marco Rubio aser Israel Ato kilonser Benjamin Netanyahu na jembishinü kaogo aser taoba hopta Qatar nung amakba aitsütsü region nung lenirtem Doha nung adenshia lir, koba atema Israel leniri tenüng agir.

Hombarnü West Jerusalem nung aliba Netanyahu indang office nung tena ghonda asem senden amen aser iba sülen külemi osangbener den jembidang, linük ana kumzüka ayutsü asoshi maneni Israel aser US külemi inyaktsü, ta Netanyahu-i ashi. "Rubio-i semdangba ya kiralongra timtem ajurua alidak Israel den America nokdaka lir ta sayuba kuli tejangja lir," ta Netanyahu-i ashi.

Iba rara nung Israel tsütsü Rubio tejak ashi aser, "Region nung yimjung aser security amokmerenba anentsü asoshi Hamas samatsütsü nüngdaker," ta ashi.

US envoy Mike Huckabee den külemi Rubio aser

Netanyahu nungeri Western Wall semdanger anogo ka lir telungjem ya sayua liasü.

Hombarnü United Nations Human Rights Council sangdong ka nung, tang tesüsa Israel-i Qatar nung tashiyim amshiba dak sendakba nung Mongulbarnü o inteptsü ta shia lir.

O inteptsü asoshi tasüngdangba ana onok dangi aruogo - ka Organisation of Islamic Cooperation (OIC) züngsem linüktem tenüng nung Pakistan nungi aser ka Gulf Cooperation Council (GCC) tenüng nung Kuwait nungi aru, ta council-i ashi.

Iba senden ya 2006 küm iba council tenteter ajungben o intepba 10 buba alitsü.

Israel-i tashiyim amshiba indang council ajanga ngutetba aser pangzüng tem Israel-i magizüker, kong taoba küm linük ajunga dang Israel dang nok-nü mayoktsü mesüra magütsütsü ajungshia liasü. Küm tetenzüklen Israel aser US-i UN council nung shilem magi.

(Maneni tapak 8 nung...)

NE Zone Shooting C'ship nung Nagaland-i gold medal 6 angu



Dimapur, Rongjui/September 15 (Agencies):

National Rifle Association of India (NRAI)-i achaayanga 12buba North East Zone Shooting Championship, 2025 Mizoram Rifle Association (MRA)-i ayongzüka asayaogo. Iba asayamung ya September 8 nungi 13 tashi MRA Shooting Gallery, Mualpui, Aizawl, Mizoram nung asaya liasü.

Iba asayamung nung Nagaland nungi tetsür 4 aser tebur 8 ta ajak senteper shooter 12-i shilem agi aser parnok gold medal trok aser silver medal pezü ngua liasü.

Asayamung nung Mizoram-i gold medal 27 ngua parnok overall championship liasü aser parnok sülen Meghalaya 24 Gold, Assam 17 Gold, Nagaland 6 Gold, Assam Rifle Marksmanship Unit (ARMU) 5 Gold, Manipur 4 Gold, Army Marksmanship Unit (AMU) 2 Gold aser Arunachal Pradesh 1 Gold nung liasü.

Nagaland nungi takok anguba asayartem yamai alitsü:

1. Kikrukhrienuo Belho 10m Air Rifle Women Individual Gold
2. Kikrukhrienuo Belho 10m

3. Kikrukhrienuo Belho 10m Air Rifle Youth Women Individual Silver
4. M Tiatemjen Jamir 10m Air Rifle Men Individual, MQS Silver
5. M Tiatemjen Jamir 50m Rifle 3 Position Master Men Individual Gold
6. Lanu Akumtoshi Jamir 50m Rifle 3 Position Master Men Individual Silver
7. M Tiatemjen Jamir 50m Rifle Prone Peep Sight Master Individual Gold
8. Lanu Akumtoshi Jamir 50m Rifle Prone Peep Sight Master Individual Silver
9. Lanu Rongsenkaba Jamir 25m Standard Pistol Men Individual Gold
10. Lanu Rongsenkaba Jamir 25m Standard Pistol Master Men Individual Gold.

BENDANGLI OSANG : Tapak 7 nungi...

Bolsonaro ken o ya 'witch hunt'...

Bolsonaro ken o nung obendang agütsütsü nunglokja aliba Supreme Court justices pongu nungi pezüi pa ken o ponguprong nung aibelen aiba ngutetba sülen iba ken o nung obendang ya Brehostibarnü agütsü. Pa aitsütsü asoshi simple majority nungdaka liasü.

Bolsonaro ya tepuokdak küm 27 aser ita asem ayutsü obendang agütsüogo, koba ano benoka jembishitsü ta pa indang okatsür temi ashir.

Trump-i iba obendang ya taoksatsüka lir ta ashi aser US Secretary of State Marco Rubio-ia US-i iba witch hunt nung tapet telangzüba agütsütsü ta sangdong.

Lula-i New York Times article nung iba ken o ya "witch hunt" ka masü ta nenshia ashi.

"Iba obendang ya küm 20 shi mitkar yimsüsüba anema timtema aruba sülen 1988 küm

Brazil indang Constitution yangluba nung aliba ama lir," ta pai zülü, anungji tazünger nem Brazil nung democracy ya mitkar yimsüsüba kübok küm 20 lir 1985 nung tanaben benokba lir ta angatetdaksür.

Brazil indang justice system-i US tech firms dak tenük yoker ta Trump administration ajanga aitsüba Lula-i magizük.

Internet aziokba nung ozü linük indang court temi mapa shidak inyak aser US firms tem tim mesüi mamshi, ta Brazil tiri ashi.

Pai essay tatem nung US Tir Trump dang indang-indanga, "linük anaprong ajangzüksü asoshi jembishiniü akatsü Brazil renema lir," ta ashi saka Trump dang Brazil indang democracy aser sovereignty indangbo mejembitsü, ta tekum dangtsü shia liasü.

Gaza rara nung Israel-US...

Hombarnü Gaza nung Israel-i amakba aser nisung-i yangluba yasa-tzüradaksüba ajanga Khan Younis nung aliba Nasser Hospital nung tepok nung aliba kinü pezü aser anojungi asoba kinü tanur asem asü.

Tang yasa-tzura aliba ajanga tanur 145 dena nisung 422 süogo, ta Gaza indang Ministry of Health ajanga

ashir. UN-i yariba Integrated Food Security Phase Classification (IPC) ajanga taoba ita Gaza shilem kar nung ayawara sangdongba sülena tanur 30 densema nisung 144 asüba tejangja lir.

Nisung aliba ki nung densema Israel-i Gaza City nung tanen makai bomb pokloktsür, aser Hombarnüa Palestine nung ter dak tema tepset.

Sen, Satwik-Chirag nunger China Masters nung asayatsü

Rongjui/September 15 (Agencies): Taoba hopta-ang Hongkong Open nung final tonga asayaba sülen India nunger tebur kija asayar Lakshya Sen aser tarep asayar Satwiksairaj Rankireddy aser Chirag Shetty nunger China Masters Super 750 badminton tournament nung asayatsü renema lir. Iba asayamung ya Mongolbarnü tenzüksü

Lakshya, shiba küm ana tsüngda taoba hopta mezügbuba Hong Kong Open nung final ka tonga asayaogo, pa yiruba den mapang talangka junga masayteti aruogo. Pa China Open nung mezügbuba asaya France nunger asayar Toma Junior Popov den asayatsü.

Almora nungi arishi küm 24 tain asayar shiba Paris Olympics nung pezübuba nung tembanga liasü, pa asayamung aika nung mezügbuba round nung tsüka liasü saka taoba hoptabo final tongtetogo.

India nunger rongnungi taküm eighth seeds Satwik aser Chirag nati tajung asaya arudar. Tenati World Championships nung bronze angü aser taoba hopta Hong Kong nunga tanabuba jenjang nung tembanga liasü. Ajisüaka tenati taküm asayamung ka danga koka mali. China Open nung tena mezügbuba asaya Malaysia nunger asayar Junaidi Arif aser Roy King Yap na den asayatsü.

Hong Kong Open nung final ita 16 nung mezügbuba final asayaba liasü.

Tebur kija asaya nung lanur asayar Ayush Shetty, shibai taoba hopta Japan nunger asayar Kodai Naraoka koka liasü pa iba asayamung nung mezügbuba asaya Chinese Taipei nunger asayar Chou Tien Chen den asayatsü.

Tetsür kij asaya nung PV Sindhu mezügbuba round Denmark tsür Dawall Jakobsen den asayatsü. Tena taoba mapang anaben asayaogo aser taküm Swiss Open nung tesüsabuba asayaba mapang Jakobsen-i takok ngua liasü.

Arishi küm 30 tain asayar yagi China tsür world No. 2 Wang Zhi Yi koka World Championships quarterfinals atong saka Line Christophersen-i tsükdaksü.

Tetsür tarep asaya nung Rutaparna aser Swetaparna na Malaysia tsür Ong Xin Yee aser Carmen Ting na den asayatsü.

Tarep temeyoktep asaya nung Rohan Kapoor aser Ruthvika Shivani Gadde na Japan nunger tarep Yuichi Shimogami aser Sayaka Hobara na den asayatsü aser Dhruv Kapila aser Tanisha Crasto nata China nunger second seeds Feng Yan Zhe aser Huang Dong Ping na den asayatsü.

Siraj nem ICC Player of the Month naroküm agütsü



Rongjui/September 15, 2025 (Agencies): India nunger asayar Mohammed Siraj nem August ita atema ICC Player of the Month naroküm agütsüogo. England den tatembangbuba Test asaya nung kanga junga asayaba sülen pa nem iba naroküm agütsüogo.

Tetsürtem rongnungi Ireland tsür Orla Prendergast nem August ita atema ICC Player of the Month naroküm agütsüogo.

Oval nung tatembangbuba anogo Siraj-i kanga junga asayaba ajanga India-i run trok agi England koka liasü.

Test pongububa tatembangbuba anogo Siraj-i kang dang tongtibang wicket asem agia iba asaya nung pai ajak senteper wicket teku agi,

aser iba asayamung 2-2 agi sdraw asüba nung India nem teyari agüja liasü. Ajisüaka pai Test cricket nung kanga junga asayaka pa tang asaya aliba T20 Asia Cup atemabo India team nung meshim.

"ICC Player of the Month naroküm agütsüba ya tetushi tulu lir. Anderson-Tendulkar Trophy ya teti bilemtetsüsa asayamung tajung ka liasü, aser ni asayaba asayamungtem rongnung iba ya ajak dang nungi kanga tesashiba toktepa asayaogo," ta Siraj-i ashi.

"Ni ball kanga junga ona teyari agütsütetba aser talisa tongtibang mapang nung teyari agütsütetba atema palar. Par linük nung batter tajungtem dang ball aontsü temela masü, saka iba ajanga kü dak kechi tajungüba ali aji adokdaksüogo," ta paisa shisem.

Tetsürtem rongnung Prendergast-i, Pakistan tsür Muneeba Ali aser Netherlands tsür Iris Zwilling na ajateta iba naroküm nguogo.

Prendergast-i kidang Pakistan den T20 asayaba mapang Player of the Series naroküm angü. Lar team-i asayamung 2-1 agi akokba nung lai teyari agüja liasü. Asayamung nung lai run 144 yanglu aser wicket pezü agia liasü.

Prendergast-i August ita maneni ICC Women's T20 World Cup Europe Qualifier nunga kanga junga asaya-a run 244 yanglu aser wicket tenet agia liasü.

BILEMDANGANG

"Tamang ji tamang agi mekottettsü saka tesangwa agi dang kottettsü."